



08.05.2023

UPA2023/66  
Paneeraq Olsen, Naleraq

**Illoqarfigisaq qimallugu erniartortartut ilaqutaasalu, unammillernartumik atugarisaat pil-lugit qulaajaanermik iliuusissatullu pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Iliuusissatut pilersaarut UKA24-p aallartinnginnerani saqqummiunneqarsimassaaq.**

(Inatsisartunut ilaasortaq Mikivsusuk Thomassen, Inuit Ataqtigiit)

### **Oqaaseqaat:**

Naleqqaminngaaniit siunnersuuteqartumut Inatsisartunut ilaasortamut Mikivsusuk Thomassen, Inuit Ataqtigiit siunnersuuteqarneranut qujarusuppugut.

Ullutsinni nersunartaqaat naartusortannguagut aapparisaatik nunagisartillu qimallugu aallarlutik erniartortarmata. Meeraqarunillu meerannguamik nukangasut anaanaminnik pisariaqartitsileruttortut qimallugit aallartarmata. Inuunermi misigisat aqqusaakkallu nuannernerpaajusussaagaluartoq, kiserliornermik, annikiginermik, erngumanermik toqqisisimannginnermillu taarserneqartarpoq asaat asannitsillu qimallugit aallartarneq. Asulu ullumikkut inatsisitigut periarfissaanani aapparisaq qitornaqarsimagaannilu qitornarisat ilaginissaannut.

Kisianni ippassaanikkunni maj-ip pingajuani Sulinermik Inuutissarsiutillit Katuffiat SIK nuannerluinnartumik nalunaaruteqarpoq tassa SIK-p ilaasortaminnut Isumaginninnermut Aningaasaateqarfimmittit anaanaasut sinerissamut aallarlutik erniartortariaqarnerini ataatanngortussat angalanissaannut akiliussinnaanngormatigit. Aammalu meeraqarpata 18-it inorlugit ukiulinnik meeqqat ilanngullugit angalanerannut akiliunneqarsinnaanngortut nalunaaruteqarmata.

SIK torrallaarujussuarpusi ilaasortasi pitsaalluinnartumik periarfissikkassigit pisortat sulii periarfissinngitsut. SIK qujanaq.

Ullumikkut nunaqarfinni illoqarfinnilu avinngarusimasuni Nuummumt erniartorneq nalinginnaavoq, naartugisap ernumananngitsumik aammalu toqqisisimanartumik inunngornissaa pillugu. Ittoqqortoormiuniit Tasiilamut Nuummulluunniit ilaannilu tassangaannarpat Island-imi erniartortoqartarpoq. Aammalumi illoqarfiit juumooqarfiusunngaaneersut soorlu Sisimiuninngaaneersut naartusoq arlaatigut ernumanartoqarsimappat Nuummumt erniartortinneqartarlutik. Nuummumt erniartoreersimagaanni nalinginaavoq aamma tullissaani naartoqqippat aamma Nuummumt erniartortinneqartarluni.



Najugaq qimallugu erniartortarneq pillugu juumuut peqatigiiffiata arlaleriarluni tusagassiuutitigut oqariartuutigisarpaa ernisumut qanoq sunniuteqarsinnaanersoq aammalu kissaatiginartillugu sinerissami juumuut sulii amerlanerusariaqarneri naartusut sumiiffini tikillugit malinnaaffiginissaat siunnersornissaallu pillugit.

Sooq Nuummut naartusortagut erniartortinneqartarpat? Siornatigut inunngorlutik toqusartut amerlassusiisa appartinnissaat siunertaralugu nakorsaqaarfimmuut pilaanermik aammalu sinitsitsisinnaasumik nakorsalimmuut aallartinneqartarput. Sulii ulloq manna tikillugu taamaappoq.

Peqqissutsimut Naalakkersuisup akissuteqaammini oqaatigaa ukiuni kingullerni Peqqinnissaqaarfiup sulisussarsiornermini aamma sulereersunik tigungmiinnarnissaannut annertuumik unammilligaqarlutik. Pingaartuminngooq nakorsat immikkut ilisimasallit pilattaanermik misilittagallit imaluunniit tassangaannartumik erninermi ajornartorsiutinngorsinnaasunik isumaginnissinnaasut atorfinitsinnissaat ajornakusoorsimasoq. Naleqqaminngaaniit pissusissamisoorlutut isigaarput ernisut inunngortussarlu toqqissisimasumik avatangiiseqartillugit passunnissaat.

Sinerissami juumuut amerlanerunissaannut juumuut peqatigiiffiata oqariartuutaat Naleqqaminngaaniit isumaqatigaarput. Taamaattumik Naleqqamit isumaqarpugut sinerissami juumuut amerlineqarnissaanut periarfissat ilanngullugit misissorneqassasut. Peqqissutsimut Naalakkersuisuutitaqarnitsinni suliaq aallartinnikoq massakkullu Naalakkersuisut nanginnikuusaat iluarisimaarparput taamaattumillu Peqqinnissamut Ataatsimiititaliarsuup innersuussaanut ilaangippat piaartumik sumiiffinni juumuut qanoq amerlisarneqarsinnaanerannut suliamik aallartitsisoqarnissaa kissaatigissavarput.

Ernisussat ilaqutaasalu pitsaanerpaamik toqqisisimanartumik pilluarfiusumillu avatangiiseqarnissaannut iliuusissamik pilersaarusiornissamik Naalakkersuisut piumaffigineqarneri Naleqqaminngaanniit isumaqatigaarput.

Naleqqaminngaaniit kissaatigaarput Inatsisartut Ilaqutariinnermut Peqqissutsimullu Ataatsimiititaliaanut aalajangiiffigisassatut siunnersuut ingerlatinneqassasoq.